

Rekod Zaidatul petanda positif

CYBERJAYA 9 Mac - Kejayaan ratu pecut negara Zaidatul Husniah Zulkifli memperbaharui rekod kebangsaan dalam Kejohanan ASA Speed Series 2 di Bloemfontein, Afrika Selatan hari ini merupakan petanda positif untuk Malaysia menguasai acara pecut dalam Sukan SEA 2017.

Menteri Belia dan Sukan, Khairy Jamaluddin berkata berdasarkan prestasi yang ditunjukkan pasukan negara dalam acara pecut kategori lelaki dan wanita, beliau yakin Malaysia mampu merangkul kedudukan podium dalam acara tersebut pada Ogos ini.

"Ini adalah petanda baik, bukan hendak kata sudah pasti tetapi kita mempunyai peluang cerah dalam acara pecut Sukan SEA ter-

utamanya dengan kejayaan dicapai Zaidatul Husniah hari ini.

"Saya yakin dengan pembangunan sukan lari pecut dan berharap mereka sampai kemuncak ketika Sukan SEA nanti," katanya dalam sidang akhbar selepas program Transformasi Nasional 2050 (TN50): Dialog Bersama Usahawan Muda di Pusat Inovasi dan Kreativiti Global Malaysia (MaGIC) di sini hari ini.

Zaidatul Husniah berjaya memperbaharui rekod kebangsaan 100 meter wanita dengan catatan 11.45 saat pada kejohanan tersebut sekali gus mengatasi rekod lama 11.50 saat yang dicipta G.Shanti 24 tahun lalu.

Pada masa sama, Khairy mengucapkan tahniah kepada Zaidatul Husniah.